

若此不已終至於弓箭相加則其生事必速矣今此來居之事其出於  
遼東之意乎其亦中朝所知之事乎若中朝所知之事則彼島本非我  
國之地其人等逐之復來而我國越江驅逐中朝聞之而以為非則無  
乃尤為惶恐乎然此非兵曹所可獨斷其議于大臣○良方坤方自氣  
布天○丁丑忠清道清風郡忠義衛尹霖之家失火其母老不能出霖  
妻挺身投救與其女兒俱至於死 上嘉其義烈命加褒獎○三公議  
啓曰黔同島事臣等亦為驚駭 上教至當隣近官軍人不可抄發但  
遼東既為處置當禾穀茂盛之時而踏刈之可也交鋒則不可今聖節  
使南孝義入去時更論遼東為當傳曰依啓○傳曰崔世節立朝已久  
陞加資為判書六卿則重任今可適也加資則不須改正○以洪彥弼  
為刑曹判書沈彥光為司憲府大司憲趙元紀為知中樞府事○戊寅  
夜北方有氣如火○己卯憲府啓曰崔世節人物庸常多有物論決不  
可為正二品之職故重惜名器累日論執既從公論即命改正旋命仍  
資非徒官爵之濫政令亦似顛倒請速收成命且今聞政府之議黔同  
島唐人耕種禾穀待茂盛踏損云上國之人非敵國之比不先請遼東  
而徑自踏損非徒有乖事大之禮恐或有將來之釁義州牧使金鐵壽